



## Sodat my huis vol kan word

**Sondag 25 Augustus 2019 is Sondag vir Persone met Gestremdheid.**

*Ek het al so bietjie opgegee op die kerk. Dis net so moeilik om regtig in te skakel. Die feit dat ek 'n parapleeg is en 'n rolstoel gebruik, maak dat ek wel dinge 'n bietjie anders moet doen. Dit beteken egter nie dat ek NIKS kan doen nie. Ek sal bv graag wil deelneem aan die kinderbediening. As die lokaal waar kinders op Sondagoggende bymekaar kom toeganklik gemaak kan word, glo ek dat ek 'n sinvolle bydrae daar kan lewer. Ek voel egter dat ek nie regtig vertrou word nie. Sommige ouers het al laat blyk dat hulle nie hul kinders wil blootstel aan iemand soos ek nie. Ek dink egter dat ons gestremdes sinvol kan praat oor ons geestelike ervarings, juis te midde van ons lewensuitdagings.*

Hierdie is die storie van Marinda, 'n 40-jarige dame wat maar elke Sondag radiokerk luister terwyl sy in staat is om met 'n bietjie hulp wel haar eie lewe te bestuur. Die jaarlikse Sondag vir Persone met Gestremdheid wil die aandag vestig op hierdie leemte in kerke.

In Lukas 14: 16-23 berei 'n man 'n groot fees voor en stuur baie uitnodigings uit. Maar die meeste van die genooies het verskonings en weier om te kom. Die man besluit toe om die dorpsmense wat gewoonlik nie na 'n fees genooi word nie, uit te nooi. Sy vrygewigheid was verstommend, hy wou sy huis vol hê! Mense met gestremdheid moes spesifiek ingesluit word voor die fees kon begin.

Op 25 Augustus 2019 (of enige ander dag wat by jou kerkprogram pas) word Suid-Afrikaanse kerke uitgenooi om 'n "vol huis" te reël deur spesiaal persone met gestremdheid te nooi om hul rol in die kerk te vier. Die volgende is idees vir hierdie fees:

- Maak voorsiening vir persone met gestremdheid om 'n leidende rol in die erediens te vervul, byvoorbeeld deur te preek, getuie te deel, of uit die Bybel in Braille te lees.
- Reël 'n ete waar gestremde en nie-gestremde persone wedersyds na mekaar kan uitreik in 'n ontspanne atmosfeer om hul lewenservaringe met mekaar te deel.
- Tydens die ete kan geleentheid vir kinders geskep word om saam met ander kinders met gestremdheid 'n speletjie te speel. Maak seker die interaksie is spontaan.
- Wend daadwerklike pogings aan om voortgaande vriendskappe te bou tussen gestremdes en nie-gestremdes.
- Loop om die kerkgebou en al die fasiliteite van die kerk, en gee dié met gestremdheid geleentheid om hul uitdagings om op die terrein oor die weg te kom, te deel.
- Skep 'n geleentheid vir persone met gestremdheid om hul gawes vir die kerk aan te bied en vind saam maniere om dit werklik te implementeer.
- Vind maniere om die aantal persone met gestremdheid wat aktief by jul kerklike lewe betrokke is, uit te brei.

[RampUp is 'n bron van inligting vir die kerk, ten opsigte van die insluiting van persone met gestremdheid. Kontak ons by [www.rampup.co.za](http://www.rampup.co.za); Erna Möller [erna@tlm.co.za](mailto:erna@tlm.co.za); 012 345 4914 of 082 731 9857.]

**Erna Möller**  
**Maatskaplike Werker/Programbestuurder RampUp**

Teken in om 'n skakel na blitspos te ontvang  
Nuus, berigte en kort kommentaar (uiters 100 woorde) aan [produksie@nhk.co.za](mailto:produksie@nhk.co.za)

Webblad van die Hervormde Kerk [www.nhka.org](http://www.nhka.org)

Die redaksie aanvaar verantwoordelikheid vir die inhoud. Menings deur skrywers uitgespreek, is egter nie noodwendig die beleid of standpunt van die Hervormde Kerk nie.

## Lief en leed

- **Die volgende predikante verjaar tot 16 Augustus, en word hartlik geluk gewens:**
  - o Donderdag 8 Augustus: Ds JB (Jan) Schutte (emeritus)
  - o Saterdag 10 Augustus: Di J (Johan) Ayres (Germiston) en D (Denise) Schmidt (Klerksdorp-Suid)
  - o Dinsdag 13 Augustus: Ds JMJ (Jan) de Wet (emeritus)

## Gemeentes en bediening



Ds Lammert van  
Rooyen

- **Ds LS (Lammert) van Rooyen** (beroepafwagend) het 'n beroep ontvang na Lichtenburg-Oos.
- Die **SP Engelbrecht-museum se Facebookblad** het op 8 Julie met 'n aftelling na die AKV begin. Lesers kan deel word van die Facebookblad van die Museum en elke dag historiese brokkies oor die AKV's ontvang.
- Dankie aan almal wat reeds besoek afgelê het by die **SP Engelbrecht-museum** en afspraak gemaak het vir die res van die jaar. **Finalejaargroep** is veral hartlik welkom. Kontak ds Johann de Bruin by 082 733 3951.
- Die **Eendrachtkring** van emerituspredikante en predikanteweduwees hou vergadering op **Donderdag 15 Augustus om 10:00** in die kerkgebou van Gemeente Wonderboompoort en besoek daarna die Museum; hulle sluit die oggend af met sop en broodjies in die saal. **Antwoord asseblief voor 12 Augustus** by Jeanette Fourie, 082 429 1565.
- **Gemeente Bronkhorstspruit** wil 'n spesiale geskenk vir oudskriba Andries Steyn en sy vrou Catharina gee. Die ou **yster-Kerkwapens** wat by die Museum te koop was, is uitverkoop. Miskien is daar iemand wat so 'n Kerkwapen het en bereid is om dit aan hulle te skenk of te verkoop. Kontak ds Jan van Staden by 082 391 0883.

## Vergaderings

- Donderdag 8 Augustus: ADV Finkom
- Donderdag 15 Augustus: ADV Dagbestuur

## 'n Gedig

### Voor-lente

Die rankroos ruk nou handuit,  
tart suikerpienk en ongepoets  
die draadprieel se stigtelike raam.

Miskien verveel die rankroos haar.  
Daarom dat trossies in die voorlente  
so handjie-oop en opwaarts staan  
en klim en aanhou blom.

Die sin van roekelose rank  
lê in die klein vertoef  
as dorings heg of bind  
en so terloops  
'n stralekrans ontstaan.

**Zandra Bezuidenhout**  
(Uit: *Aardling*, 2006)

## Kerklike publikasies

- Lees in *Die Hervormer* van Augustus 2019

- o Die vrou as predikant
- o 'n Splinternuwe webblad!
- o Gebruik by Nagmaal

Lees *Die Hervormer* volledig by <http://nhka.org/die-hervormer/>



- Daar is verskeie **Standaardbybels (swart, hardeband) in inheemse tale** teen R130 elk (versending uitgesluit) by die boekwinkel in Derdepoot beskikbaar: Isixhosa 1975; Isindebele 2012; Xitsonga 1989; Shona 1949; Tshivenda 1998; Suid-Sotho 1909; Xhosa 1975; Swati 1996; en Sesotho 1989. Bestel by mev Sarie Roux, 012 322 8885 x3025 of [sentik@nhk.co.za](mailto:sentik@nhk.co.za).

- **Bybelse Dagboek / Almanak 2019**

Nou net R100 (versending uitgesluit)

Kry belangrike inligting oor die Hervormde Kerk én 'n inspirerende Bybelse dagboek in een omslag  
Bestel by [sentik@nhk.co.za](mailto:sentik@nhk.co.za)



## Toerusting



**Gespreksbord:**  
Volhoubare missionale kerkwees

Hierdie gespreksbord help die gemeente se leiers om nuut oor gestuur-wees te dink.

Aktiveer dialoog en deelname en maak gelowiges se verbeelding los oor hoe om hul gemeente nuut te positioneer vir deelname aan God se groot beweging in die wêreld.

Bestel van mev Sarie Roux by [sentik@nhk.co.za](mailto:sentik@nhk.co.za)



R250 (posgeld uitgesluit)

BM  
Bybel Media

- **Jaarlikse simposium van die *Tydskrif vir Hervormde Teologie (THT)***

**Woensdag 14 Augustus vanaf 09:00**

**By Gemeente Philadelphia (Let wel: Nie by Midstream nie)**

Vanjaar val die fokus op Karl Barth

Sprekers: Proff Natie van Wyk en Wim Dreyer;

dr Barry van Wyk, Kobus Labuschagne en Elritia le Roux

Predikante, dosente, studente en ander belangstellendes welkom

5 VBO-punte vir predikante wat bywoon

Navrae aan dr Elritia le Roux by 072 235 6904 of [elritialeroux82@gmail.com](mailto:elritialeroux82@gmail.com)

## WERKWINKEL: MULTISENSORIESE PREDIKING

Hoe om in die konteks van dalende kerkgetalle en opkomende digitale kultuur God se Woord effektief te kommunikeer

Dr Johan Lötter en prof Pierre Jordaan  
20 VBO-punte

Hervormde Gemeente Pretoria-Oos  
Donderdag 29 Augustus 08:30-16:00  
Verversings, middagete,

5 preeksetse en leesmateriaal  
R750 voor of op 24 Augustus  
(laatbesprekings R800)

Hervormde predikante ontvang na die kursus R250 subsidie  
Bevestig by [jlotter@carfone.net](mailto:jlotter@carfone.net) met bewys van betaling  
Maksimum 30 inskrywings – reageer betyds!

Bankbesonderhede:

WJ Lötter, FNB Spaar, tak Parys, rekeningnommer 6251 3554 891  
Volg ons op Facebook by PREEKSKOOL



## Barmhartigheid

- **ADV Rampfonds: Droogtehelp aan die Noord-Kaap.** Die droogte in die omgewing van Calvinia en Williston in die Noord-Kaap is kritiek. Die ADV het 'n versoek om hulp ontvang, en besluit om deur die Rampfonds betrokke te wees. In die proses vat ons hande met 'n **inisiatief uit die Delmas-omgewing** waar 'n vragmotor met 20 ton voer na hierdie gebied gestuur sal word. Hiermee vra ons enige gemeente of gelowige wat 'n bydrae wil lewer, om die inisiatief te ondersteun. Die bydraes kan in die volgende **bankrekening** inbetaal word: Raad van Finansies, ABSA tjekrekening, rekeningnommer 020 000 287, takkode 632005, verwysing 16RAMP + gemeentenaam. Daar is ook belastingvrystelling (Artikel 18A) beskikbaar vir besighede of individue wat 'n bydrae maak. Dit werk deur die **ADV se nie-winsgewende maatskappy Plesion**. Indien u hierin belangstel, moet u betaling nie in bogenoemde rekening inbetaal word nie, maar wel in dié van Plesion. Kontak ds Gerhard Stoltz by [gerhard@diakens.co.za](mailto:gerhard@diakens.co.za) vir die nodige inligting.
- Die Sondag net na Loslitdag (Vrydag 6 September) word 'n spesiale deurkollekte ten bate van die **Transoranje Instituut vir Buitengewone Onderwys (TOIBO)** opgeneem. Die geskeduleerde datum is dus **8 September** (hoewel gemeentes 'n ander datum kan kies). TOIBO se missie is om **leerders met spesiale onderwysbehoefte** in staat te stel om hul potensiaal te verwesenlik in elk van die vyf buitengewone skole met 'n Christelike etos (<https://toibo.org.za/?lang=af>). Die fondse wat ingesamel word, word uitsluitlik gebruik om kinders met gestremdhede te help om 'n hoë kwaliteit skoolopvoeding te kry. Dit sluit ook in dat noodsaaklike behoeftes soos klere, toiletbenodigdhede, kos, ensovoorts, vir behoeftige kinders met gestremdhede aandag kry.
- **Machteld Postmus-behuisingskompleks vir bejaardes** in Brooklyn, Pretoria: die ideale plek vir u aftrede. Pragtige, ruim **drieslaapkamer-woonregwoonstelle** beskikbaar teen R1 164 940 vir afgetredenes. Die wooneenhede is beskikbaar vanaf 1 Augustus 2019, in 'n rustige omgewing naby busroetes en 'n winkelkompleks. Verskeie dienste word op die perseel gelewer, asook sosiale aktiwiteite. Kontak mev Hannelie Fourie by 012 325 1857 x202 vir meer inligting.
- **Machteld Postmus-behuisingskompleks vir bejaardes** in Brooklyn, Pretoria, beskik tans oor **kamerfasiliteite in Riekie Boshoff** teen R3 140 per maand. Kontak mev Hannelie Fourie by 012 325 1857.
- **Louis Trichardt-behuisingskompleks vir bejaardes** in Danville, Pretoria, bied kamergeriewe met drie etes per dag teen R4 435 per maand. Vir meer inligting, kontak mev Vicky Muller by 012 386 5310.
- **Ons Tuis (Andries Marié Oosthuizen) in Parys** het tans plek beskikbaar in die tehuise vir versorging van verswakte bejaardes. 'n Volledige versorgingsfasiliteit sluit in 24 uur versorging, drie maaltye per dag en sekuriteit. Vir meer besonderhede, skakel matrone T Broodryk by 056 811 2185.

- **Seniordal-aftreeoord (blok woonstelle)**

- **Lewensreg te koop**

- 2-slaapkamer @ R560 000

- 1½-slaapkamer @ R520 000

- 1-slaapkamer @ R515 000

- Groot tuine om in te ontspan

- Geen versorging

- **Daar is nou ook huureenhede beskikbaar**

- Skakel Ansie Lombard (bestuurder)

- 012 329 4318 / 084 920 8723



## Allegaatjie

*Dis net ... jy sien dinge in hierdie saal wat jy nie kan verklaar nie. Jy doen as wat jy medies kan, daar's amper zero kans vir oorlewing, en dan herstel hulle. Ek glo daar is meer as net medisyne. Op die ou end is dit alles die moeite werd. Jy kan nie 'n prys op 'n lewe sit nie. (Dr Miles Bartlett van die pediatriese waakeenheid in die Netcare Garden City-hospitaal, in Rapport, 4 Augustus 2019)*

## Konserte en feeste

- **Gemeente Noordwestelike Pretoria** bied in samewerking met Laerskool Hermanstad 'n **Manie Jackson-buitelugkonsert** aan op **Donderdag 22 Augustus om 19:00** op Laerskool Hermanstad se A-rugbyveld. Veilige parkering @ R10. Daar is 'n voorvertoning en snuffelstalletjies. Heerlike eet- en drinkgoed word te koop aangebied. Bring eie kampstoel of kombes. Toegang R50 per persoon. Kontak Johanna Scholtz by 060 577 6458 of 082 928 5592, of Frikkie Boshoff by 083 320 0739.

## Fondsinsamelings

- **Motorfietse brul vir Bybels.** Motorfietsryers word genooi om saam te ry in 'n *Bible Run* op **Sondag 18 Augustus in Bloemfontein**. Dit is die sesde keer dat die rit plaasvind en dit sal weer by Naval Hill begin. Die fietsoptog sal ry na die Bikers Church, langs die Tempe-lughawe, waar Leon Ferreira 'n spesiale diens sal lei. Om te bespreek of vir meer inligting, kontak Gerrie van Dyk by 083 448 2127 of Wimpie Burger by 083 456 6075.
- **Rata: Drive for a Child Masters**  
**Dinsdag 20 Augustus by Silver Lakes Buiteklub**  
Borg 'n putjie teen R2 500  
R4 200 vir 'n 4-bal (2 gholfkaretjies, middag- en aandete ingesluit)  
R5 000 vir 'n 4-bal plus putjeborg (2 gholfkaretjies, middag- en aandete ingesluit)  
Navrae: 082 081 3213 / [info@driveforachild.co.za](mailto:info@driveforachild.co.za)  
[www.driveforachild.co.za](http://www.driveforachild.co.za)

## Basaars en markte

- **Gemeente Ottosdal: Oesfees**  
**Vrydag 30 en Saterdag 31 Augustus**  
*Vrydagaand:* Spitbraai en waenhuisdans in die Boere-uniesaal  
R120 per persoon (volwassenes) en R60 per persoon (laerskoolkinders)  
*Saterdag:* Uitstallers en kosstalletjies  
Vir die kinders springkasteel, Lazer Tag en meer...  
Navrae: [rudi.jansevanrensburg@gmail.com](mailto:rudi.jansevanrensburg@gmail.com)
- **Gemeente Rustenburg-Suid: Willerste Noordweste Lentefees**  
Kockstraat 153, Rustenburg  
**Dans: Vrydag 30 Augustus, hekke open 18:00**  
R50 (laerskoolkinders gratis)

Braaipakkies en verversings te koop

Vure, pap-en-sous word voorsien

Bring eie stoel en eetgerei

**Familiefees: Saterdag 31 Augustus vanaf 08:00**

Gratis toegang

Reusepretpark vir kinders met spookhuis, springkasteel en meer

Pap-en-kaiings, boerbrood, koeksisters, boerewors, kerrie-en-rys...

Vleissnitte, gebak

Kaartfasiliteite beskikbaar

Navrae 014 592 2364

- **Gemeente Pretoria-Oos: Kersmark**

**24, 25 en 26 Oktober**

Delyweg 100, Waterkloofpark

**Uitstallers welkom**

Kontak Chaneen Dippenaar vir aansoekvorms en meer inligting

[kersmark@pretoriaoos.com](mailto:kersmark@pretoriaoos.com)

## Kommentaar

*Sjoe, dankie, die nuwe webblad is pragtig!* (Anne-Marie Malan, sekretaresse Bybelgenootskap)

*Dankie vir 'n kerklike webwerf om op trots te wees.* (Ds Hennie la Grange, Kampersrus)

*Geluk met die nuwe blad – lyk pragtig en navigeer elegant.* (Dr Deon du Toit, beroepafwagter)

*Uitstekend! Baie geluk! Die webblad is modern, in pas met die tydsgewrig, maklik om te navigeer, sinvol en steeds Hervormd! Beste groete!* (Oudl Rudolf van Vuuren, Verwoerdburg)

*Watter aangename verrassing was dit toe my rekenaar vanoggend die nuwe webblad oopmaak! Dit lyk baie mooi en werk baie maklik. Baie geluk aan almal daarby betrokke! Dit is regtig iets om op trots te wees!* (Ds Eksteen Botes, Nelspruit)

*Watter groot lekkerte was hierdie lok-lees-flits! Pragtige en interessante artikels – maklik en gebruikersvriendelik om by uit te kom!! Het dit werklik sommer baie geniet. Sien uit daarna om die volgende uitgawes te lees.* (Elmien Botha, Theresapark)

*Baie geluk met die nuwe webblad! Dit lyk baie mooi, en moedig 'n mens aan om meer te sien... Ek is bly hieroor en sal ook wil registreer om toegang tot sekere dokumente soos lidmaatskap, doopsertifikate en pligtestate vir funksionariesse te verkry. Ek hoop om in die toekoms ook handleidings in verband met die gemeente se finansiële stelsel te ontvang – soos SAGE wat deesdae 'n nuweling vir finansiële komitees is. Alle goeie wense en seën word julle in hierdie reusevooruitgang toegewens.* (Marieta Bodenstien, Wonderboom-Suid)

## Betaalde advertensies in hierdie nuusbrief

**Die koste vir advertensies is R250 per plasing (BTW ingesluit).** Die verskuldigde bedrag moet uitgemaak word aan die Raad van Finansies, ABSA tjekrekening Nommer 020-000-287, takkode 632-005, **verwysing: u naam + blitspos.** Neem kennis dat die redaksie in uitsonderlike gevalle mag besluit om 'n advertensie nie te plaas nie en die adverteerder se geld terug te betaal.

Meer besonderhede oor advertensies kan aangevra word van [produksie@nhk.co.za](mailto:produksie@nhk.co.za).

## Gebed vir die week

Here, gee aan my die genade om te weet  
wat U wil hê ek moet weet;  
om lief te hê wat ek behoort lief te hê;  
om waarde te heg aan dié dinge  
wat vir U die waardevolste is;  
en om my weg te hou  
van alles wat vir U aanstootlik is.  
Moenie my toelaat om ander mense te oordeel  
bloot op grond van dit wat ek sien nie,  
óf te verwerp op grond van dit wat ek mense hoor sê nie.  
Leer my, Here, om te onderskei  
met die insig wat net van u Gees kom:  
tussen sienlike en onsienlike dinge, en  
tussen dit wat waar en dit wat vals is.  
Leer my om bo alles te onderskei  
wat ú wil in elke situasie is.

**Thomas à Kempis**

(Uit: *Die groot gebedeboek*, Piet Naudé, 2014)